

21/09/1998

Penjelasan Dr Mahathir akan diedar

PADANG BESAR, Ahad - Rakaman penjelasan Perdana Menteri, Datuk Seri Dr Mahathir Mohamad, kepada pemimpin Umno negeri berhubung isu pemecatan Datuk Seri Anwar Ibrahim, akan diedar kepada Umno bahagian seluruh negara, tidak lama lagi.

Ketua Penerangan Umno, Datuk Dr Yusuf Noor, berkata langkah itu bertujuan memberi gambaran lebih tepat terutama oleh Presiden parti kepada setiap ahli berhubung isu pemecatan Anwar.

Menurutnya, pengedaran pita rakaman itu adalah sebahagian usaha Jawatankuasa Penerangan Umno untuk menjelaskan perkara sebenar bagi mengelak kekeliruan di kalangan sebilangan ahli Umno.

"Kita dalam proses menyunting rakaman itu dan ia dijangka siap beberapa minggu lagi sebelum dapat diedar kepada setiap Umno bahagian," katanya kepada pemberita di sini, hari ini.

Terdahulu, beliau berucap di Majlis Penerangan Umno Pemimpin Bersama Rakyat anjuran Biro Penerangan Umno Padang Besar, di dewan Institut Kemahiran Mara (IKM).

Hadir sama, Ketua Umno bahagian Padang Besar, Datuk Azmi Khalid, Ketua Penerangan Badan Perhubungan Umno negeri, Datuk Fadzil Mahmud dan Ketua Biro Penerangan Umno Padang Besar, Nordin Abdullah.

Baru-baru ini, Perdana Menteri mengadakan perjumpaan khas dengan Badan Perhubungan Umno negeri, ketua Pemuda dan Wanita bahagian serta ahli jawatankuasanya bagi menjelaskan isu pemecatan Anwar.

(END)